



DIOCÈSE DE FRANCE
DE L'ÉGLISE APOSTOLIQUE ARMÉNIENNE
Son Excellence Monseigneur Vahan Hovhanessian, Primat de France

Է – Թ Ե Ր Թ Ի Կ
ԱՌԱՋՆՈՐԴԱՐԱՆԻ

N°. 21, Tome 2, le 28 novembre 2015


ԱՀԱԲԵԿՉՈՒԹԵԱՆ ԶՈՀԵՐՈՒ ՅԻՇԱՏԱԿԻՆ - 20 ՆՈՅԵՄԲԵՐ 2015

Ուրբաթ 20 Նոյեմբեր-ի ճիշդ ժամը 21:16-ին, Փարիզի մէջ ահաբեկչական յարձակումներէն մէկ շաբաթ ետք, Փարիզի հայոց Ս. Յովհաննէս Մկրտիչ եկեղեցւոյ զանգերը սկսան ղողանջել, որմէ ետք տեղի ունեցաւ արարողութիւն եւ աղօթք աշխարհի խաղաղութեան համար եւ յատուկ հոգեհանգիստ ահաբեկչական սպանութիւններու զոհերուն համար: Մարկաւագներու եւ քահանաներու թափօրը Սրբազան Հօր գլխաւորութեամբ առաջնորդարանէն ուղղուելով մայր դռուն մտաւ եկեղեցի, ուր Սուրբ Գրական հատուածներ կարդացուեցան ու հոգեհանգիստ կատարուեցաւ: Յուզիչ էր այն պահը, երբ եկեղեցւոյ լոյսերը մարեցան եւ ներկաները մոմ բռնած երգեցին «Տէր Ողորմեա», ձայնակցելով եկեղեցւոյ երգչախումբին: Ապա Վահան Սրբազան խօսք առնելով անդրադարձաւ օրուան խորհուրդին, շեշտեց որ Փարիզի այս յարձակումը ուղղուած էր ամբողջ աշխարհին, ինչպէս նաեւ իւրաքանչիւր հայոյ: Արարողութեան մասնակցեցան Ս. Ժիրայր Օ. Վրդ. Թաշճեան, Ս. Աւետիս Ա. Քինյ. Պալըզեան, Ս. Տիրայր Քինյ. Գըլրճեան եւ Ս. Յուսիկ Քինյ. Սարգսեան: Յիշեցնենք, որ Առաջնորդ Սրբազանը սպանութիւններու յաջորդ օրը մամլոյ հաղորդագրութիւն մը հրապարակած էր, [գոր կրնաք կարդալ այստեղ](#):




ՀՈՎՈՒԱԿԱՆ ԱՅՅԵԼՈՒԹԻՒՆ ՄԱՐՍԵԼԻ ՀԱՅ ՀԱՄԱՅՆՔԻՆ

Պոլսահայ Մշակութային եւ Հայրենակցական Միութեան եւ Մարսելի եկեղեցւոյ հրաւերով թեմակալ առաջնորդ Գերշ. Ս. Վահան Եպս. Յովհաննէսեան 8 Նոյեմբեր 2015-ին այցելեց Մարսէլ: Սրբազան Հայրը պատարագեց Ս. Սահակ-Մեսրոպ Մայր եկեղեցւոյ մէջ եւ նախագահեց Պոլսահայ Միութեան հիմնադիրներու եւ ննջեցեալ անդամներու հոգեհանգստեան արարողութեան: Իր քարոզին մէջ առաջնորդ սրբազանը վեր առաւ Միութեան հիմնադիրներու եւ ղեկավարներու զոհողութեան ոգին ի խնդիր ֆրանսահայութեան մէջ հայ մշակոյթի եւ ինքնութեան պահպանման: Ան շնորհակալութիւն յայտնեց Միութեան ներկայի ղեկավարներուն եւ անդամներուն իրենց հիմնադիրներու ժառանգութեան տէր կանգնելու համար: Պատարագէն ետք ճաշ նախատեսուած էր, ուր երգչախումբի ղեկավար Խաչիկ Երլմազեան բարի գալուստ մաղթեց բոլորին եւ Միութեան անունով շնորհակալութիւն յայտնեց Սրբազան Հօր իր այցելութեան եւ աղօթքներուն համար: Գործադրուեցաւ նաեւ գեղարուեստական յայտագիր:



ՀԱՅԿԱԿԱՆ ԵԿԵՂԵՑԻՆԵՐԸ 20-ՐԴ ԴԱՐՈՒ ՍԿԻԶԸ

Ֆրանսայի Թեմական Խորհուրդը 5-22 Նոյեմբերին 20-րդ դարու սկիզբը հայկական եկեղեցիները ներկայացնող «Carte postale»ներու ցուցահանդէս մը կազմակերպած էր Առաջնորդարանի «Նուրիան Ֆրէնկեան» սրահին մէջ: 5 Նոյեմբերին բացումը կատարելով Թեմական Խորհուրդի ատենապետ Փաթրիս Ճօլօլեան ներկայացուց Երեւանի Ցեղասպանութեան Թանգարան-Հիմնարկի տնօրէն Հայկ Դեմոյեանը եւ խօսքը փոխանցեց անոր: Հ. Դեմոյեան խօսեցաւ ցուցահանդէսի նիւթերու հաւաքման գործընթացի մասին եւ ըսաւ, որ այս քարտերը տպուած են օտարներու կողմէ եւ այդ եկեղեցիներու մեծ մասը այսօր փլատակ են կամ մզկիթի վերածուած են: Այս ցուցահանդէսը առիթ եղաւ վերյիշելու մեր կորուսեալ պատմական յուշարձանները եւ վերանորոգելու մեր յանձնառութիւնը մեր հաւաքական յիշողութեան պահպանման:



ՀՈԳԵՒՈՐԱԿԱՆՆԵՐՈՒ ՀԱՄԱԳՈՒՄԱՐ

Թեմակալ Առաջնորդ Գերշ. Ս. Վահան Եպս. Յովհաննէսեանի հրաւերով Հինգշաբթի 3 եւ Ուրբաթ 4 Դեկտեմբերին Փարիզի մէջ տեղի պիտի ունենայ եկեղեցականներու համագումար: Ֆրանսայի Թեմի բոլոր ծուխերուն մէջ գործող եկեղեցականները հրաւիրուած են այս համագումարին, նախագահութեամբ Սրբազան Հօր, քննարկելու համար թեմի առաքելութեան, ծիսական արարողութիւններու միաձեւութեան եւ հովուական ծառայութեան հետ կապուած զանազան հարցեր: Թէեւ եկեղեցականներու համագումարը բացառաբար հոգեւորականներու համար նախատեսուած է, սակայն ժամերգութիւններուն կրնան մասնակցիլ բոլոր փափաքողները: Աղօթքի համար առաջին հաւաքը տեղի պիտի ունենայ 3 Դեկտեմբերի ժամը 13-ին եւ երեկոյեան ժամերգութիւն ժամը 19-ին: Ուրբաթ ժամը 9-ին պիտի կատարուի առաւօտեան ժամերգութիւն, Ս. Յովհաննէս Մկրտիչ Մայր եկեղեցւոյ մէջ:




ԴԱՍԱԽՕՍՈՒԹԻՒՆ ՀԱՅ ՆԱՀԱՏԱԿՆԵՐՈՒ ՄԱՍԻՆ

Հինգշաբթի 5 Նոյեմբերի երեկոյեան, Հայոց Ցեղասպանութեան 100-րդ տարելիցի ծիրէն ներս Ֆրանսայի Թեմական Խորհուրդը բացառիկ դասախօսութիւն մը կազմակերպած էր հայ նահատակներու մասին: Երկու դասախօսներն էին իրաւունքի պատմութեան մասնագէտ Արամ Մարտիրոսեան եւ պատմաբան Սահակ Սրկ. Սուքիասեան: Երեկոն վարեց Թեմական Խորհուրդի անդամ Գեղամ Գեւորեան: Փրոֆ. Մարտիրոսեան հիանալի կերպով ներկայացուց նահատակները Հայ Եկեղեցւոյ կանոններու ընդմէջէն, յաճախ մեջբերումներ ընելով «Հայոց Կանոնագիրք»էն: Ս. Սուքիասեան խօսեցաւ Հայ Եկեղեցւոյ 20-րդ դարու նահատակներու մասին, զանոնք բաժնելով երկու խումբի՝ 1915-ի նահատակները եւ ստալինեան շրջանի նահատակները, ինչպէս նաեւ Ցեղասպանութեան նահատակներու սրբադասման մասին, որ տեղի ունեցաւ 23 Ապրիլ 2015-ին:



ՍՈՒՐԲ ԳԻՐՔԻ ՄԵՐՏՈՂՈՒԹԵԱՆ ԽՈՒՍԲ

Ս. Գրքի սերտողութեան խումբը պիտի հաւաքուի Չորեքշաբթի 2 Դեկտեմբերին, գլխաւորութեամբ Գերշ. Ս. Վահան Եպս. Յովհաննէսեանի: Հանդիպման սկիզբը Սրբազանը վերաքաղ մը պիտի ընէ նախորդ հանդիպման ընթացքին քննարկուած գլխաւոր կէտերուն: Ապա քննարկումները պիտի շարունակուին Մարկոսի Աւետարանի ընթերցումով: Սերտողութիւնները տեղի կունենան Ս. Յովհաննէս Մկրտիչ Մայր եկեղեցւոյ սրահին մէջ: Սերտողութեան ընթացքին Աւետարանի որոշ բաժին մը կը կարդացուի եւ կարգ մը համարներ կը մեկնաբանուին եւ կը վերլուծուի անոնց կապը Հայ Եկեղեցւոյ ուսուցումներուն եւ աւանդութիւններուն հետ: Մասնակիցները իրենց հետ կրնան բերել իրենց Աստուածաշունչը հայերէն կամ ֆրանսերէն: Ասիկա լաւ առիթ մըն է մեզի միանալու եթէ մինչեւ հիմա չէք մասնակցած մեր սերտողութիւններուն: Յաւելեալ տեղեկութիւններու համար կապ պահել Առաջնորդի Գրասենեակին հետ՝ 01 43 59 67 03 կամ համացանցով՝ bureauduprimat@yahoo.fr.



ԴԱՍԱԽՕՍՈՒԹԻՒՆ՝ «ՅԱՂԹԱՆԱԿԻ ՄԻՒՌՈՆ»

Այս տարի Մայր Աթոռ Ս. Էջմիածնի եւ Անթիլիասի մէջ կատարուեցաւ միւռնօրինէր: Հայոց Ցեղասպանութեան 100-րդ տարելիցին առթիւ Ն.Ս.Օ.Տ.Տ. Գարեգին Բ. Ամենայն Հայոց Կաթողիկոսը այս միւռնօր կոչեց «Յաղթանակի Միւռոն», որպէս խորհրդանիշ հայ ժողովուրդի անմահութեան եւ յաղթական վերածնունդին: Ուրկէ կու գայ միւռնի գործածութիւնը, ի նչ է միւռնի կապը հայ ժողովուրդին հետ, ինչպէս եւ ինչու է կը պատրաստենք միւռնը: Այս եւ նման հարցումներու պատասխանները պիտի տայ Ս. Յուսիկ Քինյ. Սարգսեանը սուրբ միւռնի նուիրում իր դասախօսութեան ընթացքին, որ տեղի պիտի ունենայ Ս. Թադէոս եւ Ս. Բարթողիմէոս առաքելներու տօնին Շաբաթ 28 Նոյեմբերի ժամը 19-ին Փարիզի Մայր եկեղեցւոյ սրահին մէջ, 15 rue Jean Goujon. Դասախօսութիւնը պիտի ընթանայ հայերէնով եւ ֆրանսերէնով, ընկերակցութեամբ նկարներու եւ ֆիլմի ցուցադրութեան: Մուտքը ազատ է:



ԿԱՐՃ ԼՈՒՐԵՐ...

- Կիրակի 29 Նոյեմբեր 2015-ին Գերշ. Ս. Վահան Եպս. Յովհաննէսեան Ամսդրամի «Սուրբ Հոգի» եկեղեցիի մէջ (Kromboomsloot 22, 1011 GW Amsterdam) պիտի մատուցէ իր անդրանիկ պատարագը որպէս Հայրապետական Պատուիրակ Արեւմտեան Եւրոպայի, եկեղեցւոյս տարեկան մատաղի առթիւ:
- Կը խնդրուի հաղորդակցիլ Առաջնորդի գրասենեակին հետ հետեւեալ էլեկտրոնային հասցէին՝ bureauduprimat@diocesearmenien.fr, կամ 01 43 59 67 03 հեռախօսահամարին միջոցաւ միայն:
- Այս տարուայ Թեմական Պատգամաւորական տարեկան ժողովի տեղի կունենայ Առաջնորդարանին մէջ Շաբաթ օր՝ 5 Դեկտեմբերին: